

## Obraćanje ambasadora Sjedinjenih Američkih Država BiH Charlesa Englisha povodom obilježavanja Dana prijateljstva BiH –SAD u Mostaru

---

5. juni 2008. godine

Članovi Predsjedništva BiH, ministri, članovi Parlamenta BiH, predstavnici Federacije BiH i Republike Srpske, kolege iz diplomatskog kora, dame i gospodo, drago mi je što smo zajedno na ovoj važnoj proslavi i demonstraciji bliske suradnje između oružanih snaga Bosne i Hercegovine i Sjedinjenih Država. Ovaj događaj koji je prije samo par godina bio nezamisliv naglašava važnost značajnih pozitivnih promjena u sigurnosnim odnosima između naših oružanih snaga i uspostavu jedinstvenih i efikasnih bh. oružanih snaga.

Sjedinjene Države će i dalje biti vodeći partner i bliski prijatelj Bosne i Hercegovine. U proteklih petnaest godina to partnerstvo i prijateljstvo uglavnom su predvodile Oružane snage Sjedinjenih Država. Naše Oružane snage prvo su došle ovdje kako bi okončale tragični i užasni rat. Desetine hiljada naših najhrabrijih mladih muškaraca i žena potom je ostalo ovdje kako bi pomogli ovoj zemlji i njenim građanima da osiguraju mir i počnu obnovu nakon razarajućeg sukoba. Danas naše Oružane snage ostaju opredijeljene da očuvaju mir i stabilnost u ovom regionu i spremne su pomoći Bosni i Hercegovini na njenom putu daljnjih integracija u NATO savez. Oružane snage Sjedinjenih Država stajale su uz Bosnu i Hercegovinu u nekim od najtežih trenutaka u nedavnoj prošlosti i ostaće iznimno odan prijatelj, partner i saveznik na vašem putu ka svjetlijoj budućnosti.

Podjednako važan garant te budućnosti su i Oružane snage Bosne i Hercegovine koje su danas ovdje sa nama. Ova slika jedinstvenih Oružanih snaga Bosne i Hercegovine u istoj uniformi koje služe pod jednom zastavom i koje poštuju jedinstven civilni lanac komandovanja dokaz su da je Bosna i Hercegovina nepovratno krenula evroatlantskim putem. Ove profesionalne i efikasne snage već su pokazale sposobnost da pomažu i građanima Bosne i Hercegovine i da daju podršku međunarodnom miru i sigurnosti. Od šumskih požara u Hercegovini, pa sve do iračke pustinje, ovi odvažni muškarci i žene iz Oružanih snaga Bosne i Hercegovine pokazali su karakter i hrabrost na što svi građani ove zemlje mogu biti ponosni.

Ne smijemo zaboraviti da sve ovo ne bi bilo moguće bez značajnih postignuća u provedbi sveobuhvatne reforme odbrane. Sjedinjene Države će i dalje snažno podržavati ovu reformu i osiguraće svu neophodnu pomoć kako bi ona bila u potpunosti provedena. Ne tako davno mnogi ljudi u ovoj zemlji sumnjali su da je takva sveobuhvatna reforma moguća. Mi smo uvijek vjerovali da ako rade zajedno, donose teške odluke i nađu prostora za kompromis, lideri ove zemlje mogu napraviti pozitivne promjene koje bi Bosnu i Hercegovinu odvele naprijed ka evroatlantskoj zajednici zemalja. Takvi lideri, okrenuti budućnosti i spremni na kompromis, potrebni su i u mnogim drugim reformama koje se trenutno suočavaju sa problemima. Samo tada će Bosna i Hercegovina moći zauzeti mjesto koje joj pripada u slobodnoj, cjelovitoj i mirnoj Evropi.

Želim zahvaliti našim domaćinima što su planirali ovaj pozitivni istorijski događaj. Iako se priroda naših odbrambenih i sigurnosnih odnosa promijenila u proteklih deset godina, Sjedinjene Države i dalje ostaju odlučne da budu bliski partner i prijatelj Bosne i Hercegovine.